



Pasop SA blitse, hier kom Amerikaanse spoed!

Wim Pretorius

Wees versigtig, Akani Simbine en Wayde van Niekerk, want dié Amerikaanse naelopers kan dalk nog jul kalklig steel.

Christian Coleman en Fred Kerley het sover vanjaar hul stemme deeglik dik gemaak in onderskeidelik die 100 m en 400 m.

Die 21-jarige Coleman spog reeds met die wêreld se voorste tyd vanjaar in die 100 m met 'n haastige 9.82 sekondes, terwyl die 22-jarige Kerley die 400 m in 43.70 afgeblits het. Dit is die vinnigste 400 m-tyd vanjaar en die sewende vinnigste in die geskiedenis.

Coleman het Donderdag in die uitdunrondes van die Amerikaanse proewe in snikhete toestande 'n 9.93 gehardloop.

Die 34-jarige Tyson Gay het in 10.17 derde in sy uitdun geëindig en kon nie die halfeindronde haal nie. Die 35-jarige Justin Gatlin het kers vasge-



Bo: Fred Kerley, die vinnigste 400 m-atleet ter wêreld vanjaar.

Foto: IAAF

Links: Christian Coleman wys hakske vir sy teenstanders in 'n uitdunronde op die Amerikaanse proewe in Sacramento, Kalifornië.

Foto: AP

hou by die jonges en 10.00 gehardloop om deur te dring.

Kerley het 'n tyd van 45.13 in sy 400 m-uitdunronde aangete-

ken nadat hy oor die laaste 30 m basies gedraf het. Hy het ná affloop van sy wedloop 'n verskuilde waarskuwing aan Van Niekerk gerig.

"Ek het baie brandstof in die tenk," het hy aan AFP gesê.

"Ek het die werk ingesit. Met oefening kan jy enigiets doen. My doelwit die seisoen? Om te wen. Om alles te wen waaraan ek deelneem. Op elke vlak."

En met Kerley wat vier van die wêreld se beste tye in die 400 m vanjaar agter sy naam het, is hy nie 'n teenstander wat ligtelik opgeneem moet word nie.

Van Niekerk, wat vanjaar op die Wêreldkampioenskappe sy slag in die 400 m en die 200 m sal wys, het nog nie vanjaar sy aandag veel toegespits op die nommer waarin hy die Olimpiese gouemedaljewen-

ner en wêreldrekordhouer is nie.

Hy het die 400 m nog net op die Vrystaatse atletiekkampioenskappe en op die Suid-Afrikaanse Universiteitsbyeenkoms gehardloop, waar hy gemaklik in onderskeidelik 48.47 en 46.28 gewen het, sonder dat dit nodig was om na 'n hoër rat oor te skakel.

Van Niekerk het egter baie aan sy vaart gewerk en het reeds vanjaar 9.94 in die 100 m, sowel as 'n Suid-Afrikaanse rekord van 19.84 in die 200 m afgeblits. Coleman is kort op sy hakke met 'n beste tyd van 19.85 in die 200 m vanjaar.

Simbine se 9.92 en 9.93, wat hy op twee ligabyeenkomste by Tuks se L.C. de Villiers-stadion gehardloop het, is die naas- en derde vinnigste tye van die jaar.

Gooi dan name soos Usain Bolt, Yohan Blake, Andre de Grasse en LaShawn Merritt in die hoed en daar is geen twyfel nie dat opwindende naellope op die Wêreldbyeenkoms op liefhebbers wag.